

# Corporaziun Evangelica Zernez

Protocol radunanza 18/1

**Radunanza generala da marcurdi, ils 18 avrigl 2018, a las 20.15, in sala da pravenda catolica a Zernez.**

Preschaints: 39 persunas cun dret da vuschar

S-chüsads: Christa Patscheider, Annina e Richard Pfeiffer, Rinaldo Angelini, Rahel Schreich, Mathias Cuorad, Lucrezia Schorta, Riccardo Weingart, Arno Felix, Irene e Duri Thom.

## Tractandas

1. Tscherna dals scrutinadurs
2. Protocol da la radunanza generala a Zernez dals 12 avrigl 2017
3. Rapport annual da la presidenta 2017
4. Rendaquint 2017 e rapport dals revisurs da quint
5. Fixar il pè d'impostas da la baselgia per l'on 2018 e 2019
6. Preventiv 2018
7. Tschernas: Elecziun d'ün(a) nouv(a) commember(-ra) dal consistori per la fracziun da Zernez
8. Tschernas: Elecziun d'ün(a) nouv(a) commember (-ra) dal consistori per la fracziun da Lavin
9. Vendita d'ün toc terrain (Nr. 3131)a la Viafier Retica
10. Lavur giuvenila – decisiun da sustegn finanziel
11. Orientaziuns
12. Varia e coral final 41

## **Bivgnaint da la presidenta Meditaziun e coral 12**

La presidenta Gabriela Angelini dà il bivgnaint a las votantas ed ils votants.

Ella surdà il pled a nos ravarenda, Patrick Brand, per üna cuorta meditaziun. Quella as basa sül inscunter da Moses cun la gloria da Dieu sülla muntogna dal Sinai (Exodus 33, 18-23) e finischa cun üna survista cun fotografias dals inscunters da nossa raspada.

A la fin da la meditaziun vain chantà il coral 12.

La presidenta constatta cha la banida saja gnüda fatta a temp ütil e la radunanza saja abla da decider. Implü dumonda ella a la radunanza da pudair agiundscher a la glista da tractandas üna tractanda. Las tractandas 11 e 12 orientaziuns e varia vegnan spostadas ed üna nouva 11avla tractanda vain tutta sü. Quella ha nom: „**Separaziun e surdatta cluchers e sunteris al cumün politic**”.

### **1. Tscherna da duos scruttinaduors**

Sco scruttinadur vain tschernü Fritz Felix

### **2. Protocol da la radunanza generala dals 19 avrigl 2017**

Il protocol nu vain plü prelet el es stat expost. Il protocol vain fat bun sco expost sainza cuntravusch.

### **3. Rapport annual da la presidenta 2017**

La presidenta, Gabriela Angelini, prelegia seis rapport annual:

L'on 2017 es statt ün on magari quiet. La Fundaziun Steiner Baselgia Lavin ha survgni fuorma e daspö ün per mais ha ella survgni eir ils prüms raps. Uschè cha ün dals gronds temas dals ultims ons po gnir miss ün pa da la vart.

Las uras da religiun han adüna darcheu dat da discutir, saja quai davart l'introducziun da las lecziuns d'etica, sur dal deport da singuls scolars obain eir sur da l'urari da scoula.

Las lavurs vi da la fatschada da la baselgia San Jon a Susch han stuvü gnir spostadas

amo üna vouta causa chi vain amo adüna lavurà vi da las chasas vaschinas da la baselgia. Cun quai chi'd es qua temp per spettar ha il consistori decis dad avair pazienza. In regard la lavur cul ravarenda es l'on 2017 stat ün dals plü quiets ons daspö cha Gabriela Angelini fa part al consistori – e quai sun fingià 12 ons. La radunanza generala ha tschernü avant ün on a Patrick Brand sco ravarenda e la fin da gün es el gnü tut sü da la Sinoda Retica oura Glion. Il contrat da lavur sco provisur ha pudü gnir müdà in ün contrat da ravarenda. Patrick Brand es in nossa raspada daspö l'october 2016 ed ha lura cumanzà ad imprendder rumantsch. Als 27 avuost dal 2017, dimmena davo 321 dis, ha el fingià tgnü sia prüma predgia dal tuot in rumantsch per l'inauguraziun da la punt da la Güstizia. Per seis ingaschamaint pro la lavur in la raspada e pro'l imprendder nossa lingua materna, ingrazcha la presidenta fich a Patrick Brand. In quist lö ingrazcha ella eir al magister da rumantsch, a sar Steivan Gaudenz.

Dapü fadias sco cul ravarenda ha il consistori gnü dal 2017 illas trattativas cul cumün politic. Progets chi s'ha prouvà dad iniziar nun han portà uschè bler sustegn sco spettà. Per la sanaziun da la fatschada da la chasa pravenda es gnü tut sü – a la fin dals quints – almain ün import da planisaziun. La tualetta es darcheu gnüda strichada our dal preventiv ed i sarà da star davo per cha la fatschenda nu va schmanhada. La lavur cun giuvenils iniziada dal cumün politic ha perconter survgni in november üna dinamica tuot insolita. L'on 2017 ha manà illas fracziuns da nossa raspada seguaintas casualias: 9 battaisems (3 mattas e 6 mats), 4 confirmads (2 mattas e 2 mats), 4 nozzas, 11 funerals, 1 entrada e 6 sortidas.

Collectas vain das-chü ramassar total fr. 11'362.40 per las differentas instituziuns chi sun dependentas da sustegn finanziel. Grazcha fich!

Ün bel ed organisatoricamaing interessant tema da l'on 2017 es stat eir il 500avel giubileum da la Refuormaziun. Qua es da manzunar impustüt la festa organisada per tuot nossa regiun a Ramosch.

Tanteraint vaina organisà sco üsità gronds e pitschens evenimaints per la cumünanza da baselgia, da predgias cumünaivlas sur predgias ecumenas fin pro'l viadi d'attempats, l'installaziun da Patrick Brand in üna predgia cumünaivla a Susch, il di da schoppa insembel culs confirmands e preparands ed oters evenimaints da cumpagnia.

Per pudair organisar tuot quai vain nus gnü grond sustegn our da nossa raspada!

Per quist ingaschamaint e per tuot la lavur prestada dad uschè bleras persunas chi han mis a disposiziun lur temp e lur savair a favur da nossa baselgia ün grond grazcha fich e sperain cha blers sajan ün oter on darcheu da la partida.

Il rapport da la presidenta vain quittä ed approvà cun ün grond applaus.

#### **4. Rendaquint e rapport dals revisurs da quint**

Claudia Duschletta preschainta il quint da gestiun ed il bilantsch per l'on 2017 e declera ün per detagls. Il quint da gestiun da la raspada serra cun ün guadogn da fr. 75'740. Da dir qua esa chi sun entradas quist on contribuziuns per la renovaziun da la baselgia San Jon a Susch, da las qualas las expensas sun statta l'on passà. Otramaing nu vess la raspada gnü quel grond guadogn. La facultà nouva da la raspada as summa cun quel guadogn a fr. 972'480 inclusiv contos specials.

La presidenta legia avant il rapport dals revisurs da quint chi s'han s-chüsats. Il rapport constata cha tuot es in bun uorden e tenor las pretaisas e propuona dad approvar il quint e da dar dis-charg als respunsabels. La radunanza fa quai sainza cuntravusch.

#### **5. Fixar il pè d'imposta da la baselgia pel 2018 e 2019**

La presidenta preschainta la proposta dad anticipar per ün on la decisiun dal pè d'imposta uschè cha quista vouta ha la radunanza da decider per duos ons. La proposta dal consistori es quella da laschar il pè d'imposta per tuots duos ons sco fin qua, pro 18.5% da l'imposta simpla dal Chantun Grischun. Las prospostas vegnan approvadas da la radunanza cun unanimità da vuschs.

#### **6. Preventiv 2018**

Claudia Duschletta preschainta il preventiv pel 2018, e sta a dispusiziun per dumondas. Il preventiv chi prevezza per l'on 2018 ün pitschen gudogn vain approvà unanim.

## **7. Tschernas: Elecziun d'ün(a) nouv() commember(-ra) dal consistori per la fracziun da Zernez**

Fingià bod avant ün on ha Angela Besio annunzcha d'as vulair retrar dal consistori. Ella ha fat part al consistori daspö il 2013 ed ha d'ürant ils ultims ons organisà divers viadis per attempats, ha güdà ad organisar ils dis da schoppa ed es statta respunsabla per l'instrucziun da religiun. Perque ha ella survgni ün regal da cumgià. Sco successiva per ella vain proponüda Esther Christoffel chi s'ha missa a dispusiziun sün dumonda dal consistori. OTRAS candidaturas nun haja dat ed ella es gnüda tschernüda in vottaziun averta cun ün grond applaus.

## **8. Tschernas: Elecziun d'ün(a) nouv() commember(-ra) dal consistori per la fracziun da Lavin**

Mathias Cuorad ha avant ün on surtut la carica sco consistorial da Lavin. El ha annunzchà ouravant da vulair restar commember dal consistori be fin ch'el ha chattà inchün plü giuven chi'd es pront da surtour quella carica. Que es stat uossa il cas, uschè ha Mathias Cuorad uossa demischionà davo ün on. Il consistori ha pudü profittar da sias cugnuschentschas sur da las tradiziuns illa fracziun da Lavin ed es grà per sia lavur. Eir el ha pudü retschaiver ün pitschen regal per seis ingaschamaint. Sco proposta per sia successiun ha el proponü a Flurina Coutinho-Walter. Eir ella es gnüda tschernüda in vottaziun averta cun ün grond applaus.

## **9. Vendita d'ün toc terrain (parcella nr. 3131 a Lavin) a la Viafier Retica**

Il suotsegnà, Hermann Thom, ha orientà a la radunanza sur da quista tractanda. La Viafier Retica vuol l'on chi vain fabricar üna nouva staziun per müdar tren a Sagliains. Quella dess gnir fabricada sül traiget da la staziun existenta vers Lavin, güsta fin pro'l suotpassagi da la via champestra. Sur quel suotpassagi es la parcella nr. 3131 chi tocca a la corporaziun evangelica. Da quella less la Viafier Retica cumprar üna pitschna stribla giossom. I's tratta da 74 meters quadrat a 5 francs, quai chi fa oura ün import da 370 francs. Ultra da quai vain dovrà ün toc implü dal prà d'ürant il temp da fabrica. Per la perdita da fain d'ürant quel temp, survain il fittadin üna indemnizaziun. Il consistori propuona d'aderir a la dumonda da la Viafier Retica, quai cha la radunanza fa cun unanimità da vuschs.

## **10. Lavur giuvenila – decisiun da sustegn finanziel**

La presidenta preschainta la tractanda e manzuna cha'l fat cha tuot la preschantaziun dal proget es stat fingià duos voutas in gazettras ed eir trattà in radunanza dal cumün politic, haja miss fich ferm suot squitsch las duos corporaziuns da baselgia refuormada e catolica ed haja eir chaschunà discussiuns. A la fin s'han però ils consistoris da las duos corporaziuns inscuntrats e sun gnüts ad üna proposta cumünaivla, nempe da collavurar uossa per üna fasa da proget da quatter ons. Davo duos ons dess gnir fatta üna evaluaziun intermediara dal proget e gnir decis scha quel vain cuntinuà o bricha. Las duos corporaziuns mettan minchüna üna persuna illa cumischiun respunsabla pel proget chi vain fuormada insembel cul cumün politic ed a la quala i fan part rapreschantants da la scoula, dals genituors e dals giuvenils sves.

Ils fr. 8000 cha las duos corporaziuns dessan contribuir minchüna per la gestiun annuala sun blers raps. Ma uschè ha la corporaziun eir la pussibilità da decider e nun es qua be per pajar. Implü cumainza uossa pür la fasa da proget per la realisaziun ed id es pussibel cha'l proget vain amo adattà e nu vain realisà precis uschè sco cha quai es uossa previs sül palperi. In quel sen dessan ils mezs chi vegnan uossa miss aint il preventiv eir pür gnir deliberats cur cha la gestiun d'üna lavur da giuventüna cumainza propcha. Cun quellas resalvas propuona il consistori da deliberar ils mezs per la fasa da proget. Quai cha la radunanza decida da far cun 38 vuschs da schi ed üna abstenziun.

## **11. Separaziun e surdatta cluchers e sunteris al cumün politic**

La presidenta preschainta il proget. Cun far las fusiuns dal cumün politic e da la raspada s'ha badà chi dà bainschi plü o main ün andamaint unifichà arreguard cluchers e sunteris in tuot las fracziuns, ma cha las relaziuns da possess nu sun brichafat dapertuot listessas.

Uschè sun la baselgia da Lavin e la baselgia gronda da Zernez da la corporaziun ed ils cluchers sco eir ils sunteris intuorn sun dal cumün politic. Oter a Brail ed a Susch ed eir pro la baselgia San Basitan a Zernez nun es la baselgia separada da la parcella chi tilla circundescha. Cun ün contrat chi vain preschantà a la raspada, dess gnir unificà tuot il possess da terrain intuorn las baselgias, da maniera cha cluchers e sunteris toccan al cumün e baselgias a la raspada. In ün seguond contrat chi vain preschantà in ün on vegnan lura amo reglats tuot ils drets da passagi vicendaivels sco eir oters drets e dovairs a regard baselgias cluchers e sunteris. La radunanza approva cun unanimità da vuschs il contrat preschantà.

## 12. Orientaziuns

La presidenta po far plüssas orientaziuns per mans da la radunanza.

- Abitaziun da pravenda a Lavin: In marz es gnüda aint la desditta per l'abitaziun a Lavin. Pel mumaint vegnan spettadas offertas per lavurs da mantegniment chi'd es da far avant co fittar inavant l'abitaziun. Previs esa da far las lavurs d'ürant il mais da g'ün. I sun fingià entradas diversas dumandas da pudair tour a fit l'abitaziun. Listess vain l'abitaziun il prüm scritta oura sco üsità, per cha la tscherna dals prossems fittadins po gnir fatta tenor criteris regulars.
- Plazza da culuoster a Susch: Hilda Thom s'ha decisa avant ün per eivnas da vulair desdir la piazza sco culuostera a Susch. Al consistori dischplascha fich la decisiun, el ha però eir incletta per tala. La piazza es gnüda scritta oura illas chaistas nairas. I füss fich salüdaivel da chattar üna o eir duos personas chi vuessan gugent far quista lavur. Per chattar üna buna soluziun per quista piazza, füss Hermann Thom pront obain da far quai inavant cun inchün oter sco sia mamma, obain eir da's retrar dal tuot e metter a disposiziun eir sia part da la piazza. Chi chi s'interessa o ha dumondas, po s'annunzchar pro Hermann Thom obain pro Gabriela Angelini.
- Votaziun da la baselgia chantunala: Als 10 da g'ün ha lö üna votaziun da la baselgia chantunala sur da la nouva constituziun da baselgia. Tuot ils commembers da la baselgia (eir quels tanter 16 e 18 ons) survegnan i'l mais mai üna busta equal a quella da votaziuns pel cumün cun aint tuot la documainta necessaria. I's po equal sco pro üna votaziun cumünala votar per scrit, manar sün posta obain büttar aint illa chartera pro la chasa pravenda a Zernez. Al di da votaziun vain drivi l'urna insembel cul cumün politic da Zernez in tuottas fracziuns.

In nossa raspada esa tradiziun cha onurificaziuns da personas chi accomplischan lur carica fingià d'ürant ün temp da giubileum, vegnan onurats in occasiun da la tractanda „Orientaziuns“. Quist on es quai nossa chaschiera Claudia Duschletta chi vain onurificada e survain ün regal per seis 25 ons servezzan.

## 13. Varia e coral final

La presidenta, Gabriela Angelini, driva la tractanda varia:

Ulrica Guidon manzuna cha l'aspet dal sunteri a Zernez nu cuntainta brichafat. Orur da la discussiun chi segua lura resulta cha quai es ün maniamaint collectiv ed i vain dumanà al consistori da scriver üna charta al cumün per dumandar che intenziuns cha quel ha arreguard üna soluziun cuntantiva per quist problem.

La radunanza po gnir serrada a las 21.30

Davo avair chantà il coral final, po la radunanza star da cumpagnia per ün apero.

La presidenta:

L'actuar:

Approvà als .....